



ILIDŽA

INFORMATIVNI BILTEN OPĆINE ILIDŽA

Ilidža • Januar 2018
• Broj 167





Donesena Odluka o usvajanju i provođenju RP „Centar Ilidža-lokalitet Hollywood“

Općinsko vijeće Ilidža na 12. redovnoj sjednici održanoj 25. januara 2018. godine donijelo je Odluku o usvajanju i provođenju izmjena i dopuna Regulacionog plana „Centar Ilidža“-lokalitet „Hollywood“ po skraćenom postupku u svrhu zamjene postojećeg građevinskog fonda za izgradnju i promjenu namjene postojećeg stambenog objekta u namjenu koja odgovara sadržaju hotela. Visina objekta ne smije preći visinu

susjednih objekata, te maksimalne spratnosti prizemlje plus šest spratova. Usvojena izmjena i dopuna ne utiče na promjene rješenja saobraćaja i komunalne infrastrukture, te se bitno ne mijenja osnovni koncept Regulacionog plana „Centar Ilidža“. Inicijativu je pokrenula firma „Mrkulić company“ d.o.o. Sarajevo. Nosilac priprema plana je bio načelnik Općine Ilidža, a nosilac izrade Zavod za planiranje razvoja Kantona Sarajevo.



Javni poziv za predlaganje kandidata za dodjelu priznanja Općine Ilidža

Na osnovu Odluke o priznanjima Općine Ilidža, Općinsko vijeće donijelo je Odluku o raspisivanju Javnog poziva za predlaganje kandidata za dodjelu priznanja Općine Ilidža i to: Zlatna i Srebrana plaketa i Zahvalnica Općine Ilidža. Priznanja Općine Ilidža dodjeljuju se pojedincima i kolektivima sa područja općine Ilidža za izuzetne uspjehe u razvoju privrednih i društvenih djelatnosti, kao i značajan doprinos u odbrani općine. Izuzetno, priznanja se mogu dodijeliti pojedincima i kolektivima koji nisu sa područja općine Ilidža, ako su njihovi rezultati primjereni ugledu općine. Priznanja se

mogu dodjeljivati i posthumno. Prijedloge za dodjelu priznanja mogu podnositi građani pojedinci, udruženja građana, savjeti mjesnih zajednica, boračke organizacije i udruženja, političke partije, vijećnici Općinskog vijeća Ilidža, općinski načelnik, ustanove i drugi organi i organizacije sa područja općine Ilidža. Priznanja se ne mogu dodijeliti uposlenicima općine Ilidža za rezultate ostvarene u obavljanju poslova predviđenih opisom radnog mjesta, vijećnicima Općinskog vijeća Ilidža i članovima Savjeta mjesnih zajednica u vrijeme trajanja mandata. Priznanja se ne mogu dodijeliti kolektivima ili pojedincima kojim su ista dodijeljena u posljednjih pet godina. Prijedlozi za dodjelu priznanja podnose se u pisanoj i elektronskoj formi sa obrazloženjem i relevantnom dokumentacijom sa naznakom za koju vrstu priznanja se podnosi prijedlog. Svaki prijedlog za dodjelu priznanja mora biti obrazložen i dokumentovan.



REDOVNA SJEDNICA OPĆINSKOG VIJEĆA

Saglasnost na Plan i Program održavanja, zaštite, rekonstrukcije i izgradnje lokalnih i nerazvrstanih cesta

Vijeće je donijelo zaključak o davanju saglasnosti na Plan i Program održavanja, zaštite, rekonstrukcije i izgradnje lokalnih i nerazvrstanih cesta na području općine Ilidža za 2018. godinu uz zaključak kojim se zahtijeva od Službe za razvoj, komunalne poslove i puteve da dostavi Vijeću informaciju o realizaciji izgradnje biciklističkih staza na području općine Ilidža, te da ubuduće ova informacija bude sastavni dio navedenog plana i programa. Zakonom o cestama Federacije BiH uređen je pravni položaj javnih cesta, upravljanje, građenje, održavanje i ustupanje radova, zaštita cesta i uslovi odvijanja prometa na cestama, finansiranje kao i druga bitna pitanja značajna za općinu na nivou lokalnih i nerazvrstanih cesta. Odredbama Odluke o razvrstavanju vangradskih cesta na području Kantona Sarajevo utvrđene su lokalne ceste na području općine Ilidža. Sve ceste koje nisu razvrstane u jednu od kategorija javnih cesta su nerazvrstane ceste i u nadležnosti su Općine. Ovim planom i programom utvrđen je obim, vrsta, vrijednost i dinamika izvođenja radova na održavanju, zaštiti, rekonstrukciji i izgradnji lokalnih i nerazvrstanih cesta u skladu s planiranim budžetskim sredstvima, a bazirano je na realnim potrebama normalnog funkcionisanja saobraćaja i na konsultacijama i prijedlozima organa mjesnih zajednica, a provodi se kroz program ljetnjeg i zimskog održavanja lokalnih i nerazvrstanih cesta. Redovno održavanje planirano je za 422,85 kilometara putnih pravaca koji su u nadležnosti Općine Ilidža, a obuhvaćene su sve lokalne ceste u dužini od 142,315 i nerazvrstane u dužini od 280.54 kilometara.

Informacija o uspjehu u učenju i vladanju učenika

Na sjednici jedna od tačaka bila je i Informacija o uspjehu u učenju i vladanju učenika osnovnih i srednjih škola na području općine Ilidža u školskoj 2016/2017. godini koju je vijeće primilo k znanju. Nastavni program se odvijao u skladu sa zakonom, koji je u cijelosti realizovan. Informacija je rađena na osnovu izvještaja o realizaciji godišnjih programa rada škola za školsku 2016/2017. godinu a na osnovu novog Zakona o osnovnom odgoju i obrazovanju Kantona Sarajevo i Zakona o srednjem obrazovanju Kantona Sarajevo.

Općina Ilidža i Ministarstvo za obrazovanje, nauku i mlade Kantona Sarajevo u školskoj 2016/2017. godini izdvojili su 1.360.000 KM za nabavku opreme, sredstava, te adaptaciju i sanaciju škola na općini Ilidža. Vijeće je takođe primilo k znanju i Informaciju o realizaciji donesenih zaključaka Općinskog vijeća Ilidža od sedme do jedanaeste redovne sjednice.



U Općini Ilidža sklopljeno 620 brakova

Vjerovatno vam je već poznato, ali podsjetit ćemo da se brak može sklopiti u građanskom i vjerskom obliku. Građanski oblik braka sklapa se isključivo pred matičarem, dok se vjerski oblik braka sklapa pred službenikom vjerske zajednice koja sa našom državom ima uređene pravne odnose. Osobe koje sklapaju brak u građanskom obliku mogu, prije ili poslije čina sklopiti vjerski brak po propisima vjerske zajednice. Sklapanje braka kao jedan od najvažnijih događaja u životu svakako zahtijeva, sve brižno planirane detalje, a značajnu ulogu imaju i općine u kojoj će se vjenčati. Sve veći broj parova svoje sudbonosno da odlučuju reći u Općini Ilidža. Tako je u 2017. godini matičar Općine Ilidža sklopio 620 brakova. U ovoj godini Općina Ilidža je zabilježila povećanje parova koji su se odlučili na zajednički život, a u prilog tome govori i podatak da je u 2016. taj broj iznosio 550.

Sklapanje braka u Općini Ilidža je jednostavno, ukoliko se dostavi sva potrebna dokumentacija. Matičar u dogovoru sa budućim bračnim partnerima određuje datum sklapanja

braka, a rok može biti kraći od 30 dana od dana prijavljivanja namjere sklapanja tog braka. Svi potrebni obrasci za obavljanje vjenčanja u Općini Ilidža su besplatni i dostupni kako na web stranici tako i na Info-pultu Općine.

Vjenčanja su besplatna srijedom i subotom u službenim prostorijama općine. Sam čin sklapanja braka se također može obaviti i van službenih prostorija Općine. Kada se sklapanje braka odobri izvan službene općinske prostorije, na mjestima kao što su hoteli, restorani, budući bračni partneri su dužni platiti novčanu naknadu, u iznosu od 400,00 KM. Sklapanje braka u ovakvim slučajevima vrši se svakog dana u vremenu od 10,00-18,00 sati. Matičar je sklopio 198 takvih brakova u 2017. Vlasnici ugostiteljskih objekata dužni su obezbjediti prikladnu prostoriju sa odgovarajućim uslovima za obavljanje svečanog čina sklapanje braka. Budući bračni partneri koji žele da brak sklope u dane koji posebnim aktom Općinskog načelnika nisu utvrđeni kao dani u kojima se vrši sklapanje brakova u službenoj općinskoj prostoriji, tj. srijedom i subotom, mogu to zahtijevati isključivo u radne dane u vremenu od 10.00 do 18.00 sati uz plaćanje naknade u iznosu od 100 KM. U prošloj godini najveći broj vjenčanja zabilježen je u septembru i to 101.



Uručeni ugovori o stipendiranju djeci slabijeg imovnog stanja, djeci bez oba roditelja i djeci bez roditeljskog staranja

Općinsko vijeće Ilidža na 11. redovnoj sjednici donijelo je Odluku o stipendiranju učenika i studenata slabijeg imovnog stanja u školskoj/akademskoj 2017/2018. godini u ukupnom iznosu od 147.250 KM. Odlukom će se stipendirati ukupno 183 učenika i studenata, od toga 135 učenika i 48 studenata. Mjesečni iznos stipendije za učenike je 75 KM, a za studente 100 KM. Stipendije će dobijati 10 mjeseci.

Vijeće je donijelo i Odluku o stipendiranju djece bez oba roditelja i djece bez roditeljskog staranja u školskoj/akademskoj 2017/2018. godini u iznosu od 40.500 KM, a stipendirat će se 42 djece, od toga devet studenata, 10 učenika srednjih i 23 učenika osnovnih škola. Učenicima srednjih i osnovnih škola mjesečni iznos stipendije je 75 KM, a studentima 100 KM.

Tim povodom načelnik Općine Ilidža prof. dr. Senaid Memić, 18. januara 2018. godine u sali Općine Ilidža svečano je uručio ugovore o stipendiranju djeci slabijeg imovnog stanja i djeci bez oba roditelja i djeci bez roditeljskog staranja. Za stipendiranje ovih kategorija Općina Ilidža je iz budžeta izdvojila ukupno 187.750 KM.

„Dodjela stipendija je naša pomoć u vašem školovanju, a ujedno i podrška obrazovanju i vaše stipendiranje je investirano u našu budućnost. Vaša jedina obaveza je da nastavite da učite i ove skromne pare utrošite korisno. Želim vam puno sreće u vašem daljnjem školovanju“, kazao je u svom obraćanju učenicima i studentima načelnik Memić.

Potpisan Ugovor o održavanju Festivala “Ilidža 2018”

Općina Ilidža će i ove godine organizovati i realizovati kulturno-muzičku manifestaciju pod nazivom Festival “Ilidža 2018. godine.” Ilidžanski festival predstavlja početke karijera najvećih interpretatora sevdalinka. Sa ciljem da i ove godine Festival okupi nove muzičke stvaraoce i interpreatore, pripreme će početi i ranije. Tehnički organizator kao i prethodne tri godine bit će Hayat televizija.

U Općini Ilidža je tim povodom 23. januara 2018. godine potpisan Ugovor o organizaciji Festivala, a potpisali su ga načelnik Općine Ilidža prof. dr. Senaid Memić i direktor Hayat televizije Elvir Švrakić.


“Ilidžanski festival, koji ima dugogodišnju tradiciju, ujedno je i odgovornost prema muzici. Svako muzičko doba nosi neku posebnost pa se nadamo da će i ove godine ponuditi publici nešto što će se pamtit. Znamo da je Ilidžanski festival naš brend, nešto što našu lokalnu zajednicu čini prepoznatljivom u cijelom regionu, a tu je i naša obaveza, a i odgovornost. Nastavljamo i ove godine s tom lijepom obavezom” izjavio je, između ostalog, načelnik Memić.

“Tim profesionalaca, muzičkih znalaca, okupljenih oko pripreme i realizacije Festivala učinit će sve kako bi Festival u skorijoj budućnosti postao najveći regionalni muzički festival. Hvala Općini Ilidža koja je nama dala zadatak, a mi ćemo se potruditi da tehnički ga organizujemo bolje nego prošle godine” dodao je Švrakić.



Prezentacija idejnog rješenja objekta namijenjenog za vrtić, centar za djecu sa posebnim potrebama i centar za zdravo staranje

U prostorijama i u organizaciji Općine Ilidža, 23. januara 2018. godine održana je prezentacija koncepta idejnog rješenja objekta namijenjenog za dječiji vrtić, Dnevni centar za djecu sa posebnim potrebama i Centar za zdravo staranje u naselju Pejton, MZ Centar Ilidža. Koncept idejnog rješenja tronamjenskog objekta uradio je Arhitektonski fakultet Sarajevo, a prezentaciji su pored predstavnika Općine Ilidža prisustvovali i predstavnici Udruženja roditelja djece i mladih s teškoćama u razvoju „Osmijeh nade“ sa Ilidže. Ovo je bio prvi radni sastanak na kojem su iznesene primjedbe i prijedlozi na ponuđeni koncept planiranog centra za sve tri namjene.





Općina Ilidža uradila Akcioni plan za borbu protiv korupcije



Korupcija u širem smislu predstavlja svaku zloupotrebu javne funkcije i položaja radi sticanja lične ili grupne koristi. U užem smislu je zloupotreba položaja ili kršenje zakona zbog pribavljanja određene, najčešće materijalne koristi. U svojoj osnovi, podrazumijeva stavljanje ličnog ispred općeg interesa od strane osobe kojoj je osnovna obaveza ili zadatak upravo zaštita javnog interesa. Kao najčešći uzroci za pojavu korupcije u društvu su: nepostojanje ili loš zakonski okvir, odsustvo institucija nadzora, netransparentno upravljanje, odsustvo odgovornosti, nedostatak profesionalne etike. Suprostavljanje korupciji je jedan od najvećih izazova javne uprave, uključujući i jedinice lokalne samouprave, a nastoji se spriječiti kroz primjenu preventivnih i represivnih mjera. U Općini Ilidža u januaru 2018. godine urađen je Akcioni plan za borbu protiv korupcije za 2018-2020. godinu.

Općina Ilidža je pristupila i izradi antikoruptionskih mjera na lokalnom nivou, a akcioni plan predstavlja jedan od ključnih dokumenata za suzbijanje korupcije, koji je kreiran s ciljem da se poveća transparentnost, efikasnost, odgovornost rada i otvorenosti lokalne administracije prema građanima. Donošenjem i realizacijom Akcionog plana, organi Općine Ilidža žele unaprijediti stepen odgovornosti i profesionalizma u radu, poboljšati proces planiranja, donošenja i sprovođenja akata i programa na transparentan način, te omogućiti podsticajni ambijent za učešće nevladinog i privatnog sektora u aktivnostima Općine. Krajnji cilj je da se pruži mogućnost za pokretanje dijaloga sa svim akterima u lokalnoj zajednici, kako bi se pronašla odgovarajuća rješenja za prevenciju korupcije. Uspostavljanje efikasnog antikoruptionskog sistema podrazumijeva kvalitetniji pristup građana informacijama o radu, ograničavanje diskrecijskih ovlaštenja, unapređenje određenih administrativnih procedura, povećanje komunikacije unutar službi, poboljšanje efikasnosti rada općine, unapređenje sistema edukacije i vrednovanja učinka zaposlenih, povećanje utjecaja građana na rad administracije, te jačanje profesionalnih i etičkih vrijednosti. Na ovaj način se povećava stupanj integriteta, transparentnosti, odgovornosti i efikasnosti uprave, a ujedno i jača povjerenje građana u rad općinske administracije.

Pravo na dječiji dodatak ostvarilo nova 633 korisnika

Pravo na dječiji dodatak u Općini Ilidža ostvarilo je 633 nova korisnika, a obnovilo je 1.376. Priznavanje prava na jednokratnu pomoć za opremu novorođenog djeteta i priznavanje prava na pomoć u prehrani djeteta do šest mjeseci i dodatna ishrana za majke-dojilje ostvarilo je 150 majki. Putem Službe za rad, socijalna pitanja, zdravstvo, izbjeglice i raseljena lica priznato je prava na novčanu pomoć za vrijeme porođaja žene-majke koja nije u radnom odnosu za 426 majki, a u radnom odnosu za njih 430.

Priznato je i pravo na subvenciju dijela troškova boravka djece u predškolskim ustanovama za 32 djece.

Sastanak koordinacionog tijela za izradu strategije za mlade

Općina Ilidža priprema se za izradu četvrte Strategije za mlade. Sastanak koordinacionog tijela održan je 18. januara 2018. a na njemu su prisustvovali predsjednici radnih grupa za obrazovanje, zapošljavanje, socijalnu politiku, slobodno vrijeme mlade-kultura i sport, zdravstvo, aktivno sudjelovanje mladih u društvu i informisanje i mobilnost mladih. Prvi korak u izradi strategije jeste analiza stanja u navednim oblastima. Razmatranje (usvajanje) ovog dokumenta planirano je za period april-juni 2018 godine. Strategija će se posmatrati kao sastavni dio dobrog upravljanja i njome se trebaju provesti određene aktivnosti. Usvajanjem Strategije osigurava se održiva podrška mladima i njihovo institucionalno djelovanje.



Identifikacija korisnika lične i porodične invalidnine za korisnike boračko-invalidske zaštite sa područja općine Ilidža

Služba za boračka pitanja Općine Ilidža obavještava korisnike boračko-invalidske zaštite da je započela identifikaciju korisnika lične i porodične invalidnine.

Svi korisnici su dužni po dobijanja poziva u roku od sedam dana javiti se u službu sa rodnim listom (ne stariji od šest mjeseci) i ličnom kartom, svakih šest mjeseci da potpišu izjavu o identifikaciji. Ukoliko korisnik boravi van područja općine Ilidža, koja vrši njegov obračun sredstava invalidnine, potrebno je svakih šest mjeseci svom nadležnom organu dostaviti ovjerenu izjavu o izvršenoj svakoj identifikaciji. To podrazumijeva izjavu ovjerenu od strane općinskog organa u drugoj općini u FBiH odnosno općini koja se nalazi u Republici Srpskoj. Ako korisnik stalno boravi u inostanstvu, obavezan je dostaviti ovjerenu izjavu koju ovjerava nadležni notarijat.

Identifikacija je potrebna da bi ove službe mogle pratiti statusne promjene korisnika, a zbog kontrole izvršavanja Zakona o pravima branilaca i članova njihovih porodica.

Ukoliko se korisnik ne odazove pozivu za dostavljanje pomenute izjave o životu ili ne pristupi se neposrednoj identifikaciji, provostepeni organ je dužan do pribavljanja, zaključkom o privremenoj obustavi, obustaviti isplatu stečenih prava.



Dodjeljeno 90 novčanih pomoći u participiranju liječenja teško oboljelih lica, a iz Budžeta izdvojeno 107.800 KM

Općina Ilidža je u 2017. godini, na osnovu Odluke o dodjeli novčane pomoći u participiranju liječenja teško oboljelih lica isplatila iz Budžeta 107.800 KM. Komisija za dodjelu novčanih pomoći primila je 147 takvih zahtjeva od čega je obrađeno i isplaćeno za njih 90, a 57 nije ispunjavalo uslove za dodjelu novčane pomoći.

Odlukom Općinskog vijeća Ilidža, a na osnovu kriterija za dodjelu jednokratne novčane pomoći socijalno najugroženijim licima s područja ove općine pozitivno je riješeno 905 zahtjeva. Za te namjene izdvojeno je 137,650KM. Komisija je opravdano ocijenila i predložila općinskom načelniku novčane pomoći od 50,00 KM do 800,00KM što je on i prihvatio. Još 157 zahtjeva će biti riješavano u 2018. iz stare godine. Za jednokratnu novčanu pomoć u Općini Ilidža se obratilo 1.169 lica.



Humanitarni bazar „Otvorena vrata“

U prostorijama JU „Sedma osnovna škola“ Ilidža 28. decembra 2017. godine održan je humanitarni bazar „Otvorena vrata“. Cilj bazara je, kao i prethodnih godina, prikupljanje sredstva za liječenje učenika Huseina Hadžića.

Husein je učenik trećeg razreda Sedme osnovne škole i od rođenja vodi bitku sa jednom rijetkom bolešću, a to je kongenitalni megakolon ili Hiršprungova bolest – bolest crijeva. Huseinu su svakodnevno potrebne liječničke konsultacije, a često mora odlaziti i u bolnicu. Husein je krajem 2017. godine bio na detaljnom pregledu i konsultacijama u Beogradu, kao i kod tima Švedskih ljekara koji su dolazili u Sarajevo.

Ovogodišnji bazar je posjetilo i dalo svoj doprinos blizu 300 osoba. Bazar su svojim učešćem, osim roditelja, učenika, nastavnika i prijatelja škole, uveličali članovi udruženja invalidnih i bolesnih osoba Blažuj i učenici srednje škole za stručno obrazovanje i radno osposobljavanje. Nakon bazara, učenici škole su za sve prisutne održali mali koncert, a premijerno je održana i predstava „Ljepotica i zvijer“ pripremljena za ovaj povod.



Besplatna pravna pomoć za 778 građana

U 2017. godini besplatnu pravnu pomoć u Općini Ilidža zatražilo je ukupno 778 osoba, od toga 528 za sastavljanje pismenih podnesaka, a 250 za usmeni savjet. Pružajući ovu vrstu pomoći, službenici zaduženi za taj segment sačinjavali su za građane žalbe, prigovore i zahtjeve po raznim osnovama te dali veliki broj usmenih pravnih savjeta. Pružanje pravne pomoći u oblasti radnih odnosa odnosilo se na sastavljanje zahtjeva i prigovora poslodavcu, žalbi nadležnim organima i tužbi nadležnom sudu, vezano za ostvarivanje prava-potraživanja iz radno pravnog odnosa.

U oblasti boračko-invalidske zaštite pravna pomoć pružena je u vidu sastavljanja tužbi Vrhovnom sudu FBiH nakon provedenog postupka revizije, odnosno zakonitog korištenja prava korisnika po Zakonu o pravima branilaca i članova njihovih porodica i žalbe za priznavanje prava na porodičnu invalidninu. Licima u stanju socijalne potrebe u 2017. godini pružena je pravna pomoć u vidu sastavljanja podnesaka radi priznavanja prava na stalnu novčanu pomoć, ličnu invalidninu, dodatka za njegu i pomoć od drugog lica i ortopedski dodatak, dječiji dodatak

Pravna pomoć se pružala građanima i iz oblasti penzijsko-invalidskog osiguranja u vidu sastavljanja žalbi i tužbi protiv rješenja Federalnog zavoda za PIO/MIO u vezi ostvarivanja prava na invalidsku i porodičnu penziju. Što se tiče pružanja pravne pomoći u oblasti građanskih stanja sastavljali su se prijedlozi za pokretanje ostavinske rasprave, prijedlozi za donošenje dopunskih rješenja o nasljeđivanju, prijedlozi za oduzimanje poslovne sposobnosti, prijedlozi za dokazivanje smrti, prijedlozi za dozvolu za sklapanje braka, prijedlozi za oduzimanje roditeljskog staranja i drugo.

Pravna pomoć je, u jednostavnijim slučajevima, pružana odmah, a ukoliko se radilo o složenijim predmetima, zahtjevi korisnika su rješavani i u roku od 24 sata.





Održana ekološko-turistička radionica

U hotelu Terme na Ilidži 31. januara i 1. februara 2018. godine, u okviru projekta "Čista rijeka Bosna" finansiranog od strane Ambasade Sjedinjenih Američkih Država u Bosni i Hercegovini, održana je ekološko-turistička radionica pod nazivom "Turizam i značaj ekološki uređenih turističkih destinacija i tranzitnih saobraćajnica uz obalu rijeke Bosne". Organizator i implementator projekta je ROTOR-Orgанизacija za razvoj turizma regije, a realizacija projekta traje do kraja 2018. godine. Fokus radionice je bio na pripremi za Eko kampanju i akcije čišćenja koje će se realizovati u proljeće ove godine, prezentaciji o zaštiti voda, potencijalnim štetnim uticajima divljih deponija na kvalitet vode, te značaju ekološki uređenih turističkih destinacija i pripadajućih saobraćajnica sa aspekta turizma. U radu radionice učestvovali su predstavnici gradova i opština u dolini rijeke Bosne.

Projekat "Čista Rijeka Bosna" bazira se na identifikaciji i uklanjanju manjih nelegalnih odlagališta čvrstog otpada u gradovima koji se nalaze uz rijeku Bosnu i uz glavnu putnu saobraćajnicu, te na animiranju stanovništva da doprinese poboljšanju stanja životne sredine u slivu rijeke. Glavni partner na projektu je Institut za zdravlje i sigurnost hrane Zenica, a ostali partneri su gradovi opštine: Ilidža, Centar Sarajevo, Ilijaš, Visoko, Kakanj, Zenica, Žepče, Zavidovići, Maglaj, Tešanj, Doboj Jug, Doboj, Modriča i Samac. Uz učešće u ovom projektu Općina Ilidža ga je podržala i finansijski.



Dodjela priznanja Danube Art Master za 2017. godinu za Nejlju Čavčić i Amnu Karović

Pobjednički rad na Međunarodnom takmičenju Umjetničko stvaralaštvo na Dunavu 2017. godine učenica Nejlje Čavčić i Amne Karović iz „Šeste osnovne škole“, Ilidža, koji su radile kao članovi ekološke sekcije pod rukovodstvom učiteljica Elme Šetić i Aline Karović Rahimić okrunjen je priznanjem koje im je dodijeljeno u Beču.

Centralna ceremonija dodjele priznanja je održana u zgradi Ujedinjenih naroda u Beču na 20. sastanku ICPDR – Međunarodne Komisije za zaštitu rijeke Dunav.

Tom prilikom učenica Amna Karović prisutnima se obratila i zahvalila na priznanju i tome što su prepoznali poruku koju su željeli poslati ovim radom, a to je povezivanje djece koja grade mostove, koja će se spojiti sa drugima prema čistijem Dunavu, bez plastičnog otpada. Prema njenim riječima nagrada i priznanje joj znači mnogo i bit će joj dodatna motivacija da prenosi poruku kako treba voditi računa o zaštiti prirodnih ljepota.



Crkva Svetog Save navršava 120 godina postojanja

Ove godine navršava se 120 godina postojanja crkve Svetog Save u Blažuju, koja više od jednog stoljeća tradicionalno okuplja pravoslavne vjernike. Pravoslavna crkva sv. Save u Blažuju, zajedno sa grobljem, smještena je u ravničarskom dijelu Sarajevskog polja u Plandištu, na zapadnom izlazu iz Sarajeva, udaljenom oko 1.500 metara sjeverno od izvorišta rijeke Bosne. Zanimljivi podaci i dokumenti koji potiču iz vremena austro-ugarske uprave u BiH, a odnose se na izgradnju pravoslavne crkve u Blažuju pronađeni su u Arhivu BiH. Iz zapisnika sačinjenog 1. decembra 1893. godine u Kotarskom uredu u Sarajevu, kojeg su potpisali kotarski predsjednik Damjan Rašeta i kancelista Jacob Reich, s jedne strane, i predsjednik Srpske pravoslavne crkvene općine u Blažuju, paroh Stevo Trifković, članovi Crkvene opštine Jovo Špirić, Jovo Grgić, Ačum Kešel, Risto Mitrić i knezovi-predstavnici pojedinih mahala Risto Mrkaja, Nedeljko Lemez, Jovo Šoja, Mićo Jokić, Vasilj Pejić, Nikola Karabatak, Lazo Čović, Ilija Grabovac, Miloš Tolja, Stevan Dursum i Stevo Čović - saznaje se da se raspravljalo o izgradnji crkve u Blažuju i da su knezovi tamošnjih mahala izrazili spremnost lokalnog stanovništva da učestvuje kao radna snaga u izgradnji objekta. Tako je ova pravoslavna crkva urađena prema projektu arhitekte Augusta Buča, projektanta Gradske tržnice u Sarajevu, kao i nekoliko vila u aleji na Ilidži.

Temelj crkve osveštan je na Petrovdan 1896. godine. Crkva je završena za nešto više od godinu dana, a 21. septembra 1897. godine osveštao je Njegovo visoko preosveštenstvo mitropolit dabrobosanski Nikolaj.

Crkva ima oblik slobodnog grčkog krsta, a do vrha lukovice zvonika je 28,80 metara. Likovno rješenje crkve, kao i obrada detalja ukazuju na neovardarski (neovizantijski) utjecaj. Fasada crkve je raščlanjena lizenama koje završavaju naglašenim arkadnim frizovima, što je odlika raške arhitekture. U crkvenom dvorištu nalaze se dvije grobnice: prvoj je sahranjeno 14 parohijana strijeljanih 1914. godine, dok je u drugoj sahranjeno 26 parohijana strijeljanih 1941. godine. Komisija za očuvanje nacionalnih spomenika je 2005. godine ovaj objekat proglasila nacionalnim spomenikom zbog njegovog kulturnog, povijesnog, vjerskog i etničkog značaja.

Ovaj spomenik jedan je od 101. nacionalnog spomenika koji se nalazi na području Sarajeva. Priče o tim spomenicima dio su projekta "101. medijska priča o nacionalnim spomenicima u Sarajevu" kojeg provodi Udruženje "Bosanski stećak" s ciljem promocije kulturno-historijskog naslijeđa Bosne i Hercegovine.

Iman Pašić dostojno predstavila BiH i Ilidžu

Nakon međunarodnih festivala u Turskoj i Češkoj, Iman Pašić, šesnaestogodišnja učenica drugog razreda Treće gimnazije i drugog razreda Srednje muzičke škole u Sarajevu, bila je specijalni gost na muzičkom festivalu i smotri folkloru u Zofingenu. Na poziv KUD-a Sevdah (Kulturverein Sevdah Oberentfelden-Izba) Iman je predstavljala našu zemlju kao članica muzičke sekcije Udruženja za očuvanje tradicije i kulture UTIKUS "Bašlija". Festival se tradicionalno održava svake godine, gdje se okuplja veliki broj izvođača ili folklornih grupa iz raznih zemalja. Ove godine učestvovalo je petnaest folklornih grupa iz dijaspor, te dvije iz Bosne i Hercegovine. Iman je od organizatora dobila novčanu nagradu, pehar, zahvalnice, te mnogobrojne poklone.





OPĆINSKO VIJEĆE

MUNICIPAL COUNCIL

Na osnovu člana 6. stav (1) Odluke o priznanjima općine Ilidža („Službene novine Kantona Sarajevo“, broj 36/10 i 1/14), Općinsko vijeće Ilidža na 12. redovnoj sjednici održanoj dana 25. 01. 2018. godine, donosi

ODLUKU

O RASPISIVANJU JAVNOG POZIVA ZA PREDLAGANJE KANDIDATA ZA DODJELU PRIZNANJA OPĆINE ILIDŽA

I

I Ovom odlukom Općinsko vijeće Ilidža raspisuje Javni poziv za predlaganje kandidata za dodjelu priznanja Općine Ilidža i to:

- Zlatna plaketa Općine Ilidža
- Srebrena plaketa Općine Ilidža
- Zahvalnica Općine Ilidža

Priznanja Općine Ilidža dodjeljuju se pojedincima i kolektivima sa područja općine Ilidža za izuzetne uspjehe u razvoju privrednih i društvenih djelatnosti, kao i značajan doprinos u odbrani općine.

Izuzetno, priznanja se mogu dodijeliti pojedincima i kolektivima koji nisu sa područja općine Ilidža, ako su njihovi rezultati primjereni ugledu općine.

Priznanja se mogu dodjeljivati i posthumno.

II

Prijedloge za dodjelu priznanja mogu podnositi građani pojedinci, udruženja građana, savjeti mjesnih zajednica, boračke organizacije i udruženja, političke partije, vijećnici Općinskog vijeća Ilidža, općinski načelnik, ustanove i drugi organi i organizacije sa područja općine Ilidža.

III

Kriteriji za dodjelu priznanja su slijedeći:

a) kolektivima koji su u dužem vremenskom periodu:

1. ostvarili izuzetne rezultate u radu;
2. ulagali u proširenje proizvodnih kapaciteta;
3. postigli izuzetne rezultate u oblasti nauke, kulture, prosvjetne djelatnosti, vjerskog života, sporta, zdravstva, bezbjednosti, razvoju komunalne infrastrukture, zaštiti radne i prirodne sredine i razvoju dobrih međuljudskih odnosa;
4. dali izuzetan doprinos u ostvarivanju prava građana;
5. doprinijeli poboljšanju uslova rada i života u MZ na području općine Ilidža;
6. značajno doprinijeli u organizaciji i pripremama za odbranu i odbrani zemlje;
7. dali izuzetan doprinos u drugim područjima života i rada.

b) pojedincima koji su:

1. inovatori na tehničkim i drugim unapređenjima;
2. doveli u opasnost svoj život spašavajući druge osobe i materijalna dobra;
3. kao donatori humano postupali prema pojedincima ili kolektivima;

4. posebno doprinijeli razvoju lokalne samouprave u MZ, općini i poboljšanju uslova života građana;
5. uspješno organizovali organe MZ i udruženja, te doprinijeli njihovom radu;
6. postigli izuzetne rezultate u oblasti poljoprivredne proizvodnje;
7. ostvarili posebne rezultate u sportu, vaspitno-obrazovnom radu, naučnom radu, umjetnosti i kulturi, na međunarodnom, državnom i federalnom nivou;
8. značajno doprinijeli u organizaciji i pripremama za odbranu i odbrani zemlje;
9. dali izuzetan doprinos u drugim područjima života i rada.

IV

Priznanja se ne mogu dodijeliti uposlenicima općine Ilidža za rezultate ostvarene u obavljanju poslova predviđenih opisom radnog mjesta, vijećnicima Općinskog vijeća Ilidža u vrijeme trajanja mandata i članovima Savjeta mjesnih zajednica u vrijeme trajanja mandata.

Priznanja se ne mogu dodijeliti kolektivima ili pojedincima kojima su ista dodijeljena u posljednjih pet godina.

V

Prijedlozi za dodjelu priznanja općine Ilidža podnose se u pisanoj formi sa obrazloženjem i relevantnom dokumentacijom (kopija diplome, priznanja, uvjerenja, zahvalnica i drugih dokaza) o ispunjavanju uslova sa naznakom za koju vrstu priznanja se podnosi prijedlog.

Svaki prijedlog za dodjelu priznanja mora biti obrazložen i dokumentovan. Prijedlozi za dodjelu, priznanja pored podnošenja u pisanoj formi obavezno dostaviti i u elektronskoj formi.

Prijedlozi za dodjelu priznanja općine Ilidža u skladu sa navedenim kriterijima iz ovog javnog poziva podnose se do 12. 02. 2018. godine, neposredno putem Centra za pružanje usluga građanima Općine Ilidža ili poštom na adresu:

Općina Ilidža - Općinsko vijeće - Komisija za saradnju sa drugim općinama, nagrade, priznanja, praznike i obilježavanje značajnih događaja i ličnosti

Ul. Butmirska cesta broj 12, 71210 ILIDŽA

uz naznaku

„Prijava na Javni poziv za predlaganje kandidata za dodjelu priznanja Općine Ilidža“.

VI

Javni poziv objavit će se u dnevnim novinama „Oslobođenje“ i WEB stranici Općine Ilidža.

VII

Nepotpune i neblagovremene prijave neće se uzeti u razmatranje.

PREDSJEDAVAJUĆI
Muhamed Omerović